

# ادبیات عمر و سیمیه عمری

هفته‌لق سیاسی ، ادبی و علمی غزته‌در .

جلد : ۱

سنه : ۱ ۳ ربیع‌الآخر ۱۳۳۵ جمعه ایرتسی ۱۴ کانون ثانی ۱۳۳۲ نومرو ۱۳

## تاریخده رومانی

افلاق . — طونه‌نك شمانده، قدیم ( داجیا ) Dacia خطه‌سنده تقریباً عینی‌عرندن وعین  
لسانی‌تکلم ایدر قبائل موجوداولوب بونلر شو بش ایالتی‌کندیله‌ینه وطن‌اتخاذ ایتشلردر: ۱- افلاق  
( والاکیا ) ؛ ۲- بغدادن ویا مولداوا ( مولداویا ) ؛ ۳- اردل ( ترانیلوانیا ) ؛ ۴- بوقوینا ؛  
۵- بسارابیا ( بوجاق ) . برلین معاهده‌سندن صکره ( دوبریجه ) رومانیایه‌التحاق ایتدیکندن  
( رومن ) قومی اورایه‌ده کیرمشد . بوآلتی قطعه‌دن ماعدا رومونلر بالقان شبه جزیره‌نك هان  
هریرنده ، لکن کوچك براقلیت اولق اوزره ، بولنورلر . شرقده ، صربلردن ، یونانلیلردن ،  
بولغارلردن دها غلبه‌لک اولان ( رومون ) ملتی بش‌یچق شمدیکی رومانیاده ، ایکیسی روسیه‌یه  
عائد بسارابیاده ، اوچی مجارستانه عائد اردلده ، برربع ملیونی بوقوینیاده اولق اوزره تقریباً اون  
برملیون فرددن عبارتدر . روم‌ایلیده ساکن رومون = قوچوولاح = چینچار اهلینك عددینی  
الله‌دن بشقه‌بیلن یوقدره . بوخلاق‌دین و تربیه‌اعتباریله بیزانتین‌اولوب رومون ، روم‌دن ده روم دیمکدر . هر  
قطعه‌نك تاریخی‌آیریدر . یالکز افلاق‌ایله بغدادنك مقدراتی ۱۸۶۰ دن اعتباراً برلشیر . بوملت‌من‌القدیم  
آزلیش بر حالده محافظه جنسیت ایده‌بیلمشدر . افلاق ، [ والاکیا ] کله‌سندن کلیر . اولاجه  
Zara Roumaneska [ روما مملکتی ] دیمک ایش . افلاق قدیم داجیانك قسم جنوبی‌سنده .  
کائندر . بواسکی قطعه شمدیکی رومانیادن ماعدا عصر حاضرده کی مجارستانك تقریباً نصفی احتوا ایدردی .  
ایمپراطور ( آوگوستوس ) عهدنده ایلك دفعه اولق اوزره روما لشکری داجلره قارشی  
کلدی . او حوالیده مغلوب اولان رومالیلر ایکنجی قرن میلادینك ایلك سنه‌لرینه قدر اهالی  
محلیه‌یه فدییه ویریرلردی . ایمپراطور ( ترایان ) بو مکلفیتدن قورتولق ایسته‌دی . اورالرده تهیات  
مهمه‌ده بولوندی . اردولر غالب کله‌رك مملکتی یغما ایتدیلر . الکا خالی‌قالدیغندن روما له ژئولری  
اوراده یرلشدی . بواردولرك اك سفلی ورذیل مخلوقاتدن انتخاب ایدلدیکی تاریخ‌شناسانجه‌هر ویدر .  
یدنجی عصرده روسیه‌دن کان بولغار واسلاولر اوراده راست کلدکاری رومالی زراعه ( ولاح )  
Vlah نامنی ویردکاری روایت اولنیور . ( بونك عکسی‌ده ادعا اولونمشدر ) . ۲۷۴ سنه‌سنه  
قدر روما ولاتی افلاقیده حکومت ایتشلردر . ( غوط ) ، ( هون ) ، ( گه‌پید ) ، ( لومبارد ) ،  
( آوار ) اقوامی بو مملکتی لایق‌یله یغما وتاراج ایله محو ایده‌جک درجه‌یه کتیرمشلردر .  
بونلردن قاجان اولاحلر ( کوچك افلاق ) دنیان طونه‌ایله ( آلوته ) Aluta آرده‌سنده کی

## تحمید

معزز اولسون او قدرت که خاک هجرانی  
منکشلرله و کلرله جابجا سوسلر ؛  
مکرم اولسون او فطرت که افق خسرانی  
درین و پنبه سحرلرله آشنا ایلر .

مبارک اولسون او صانع که لیل حرمانه  
ستاره لرله تسلی و زینت آوردر ؛  
مقدس اولسون او مبدع که قلب انسانه  
فیوض عشق ایله بر فسحت سما کتیریر .

ثنای نامتناهی و شکر بی پایان  
اوسرمدی، ازلی خالق محاسنه که  
جهانده شاه - اثر صنع کبریاسی اولان

کوزللك بو تماشیل بی عداد ایله  
آچوب بر افق بهشتی خیال و آماله  
اونوتدیرر بزه منفای خاک غمنا کی !

فائز عالی

## سفارتنامه آمدی غالب افندی

سببندن حرکت اولندی کون اون ایکی ساعت مسافه ده واقع و بر طرفنده حدود و جواری خراب بر مقدار قلعه  
بیابانی موجود شیش قصبه سنه عزیمت و ایرتسی یعنی شهر ذی الحجه نك یکر می طقوزنجی کونی طقوز ساعت  
اوراستیا نام نایشلی قصبه ده بیتوت اولنوب فردای سنه جدیده متیمنه یعنی بیک ایکی یوزاون ایکی سال  
فرح اشمالک ابتداسی مبارک ائذین کونی اولغله بعون اه تعالی کمال سرور و صفا ایله تفال اولنهرق یوم  
مرقومده دخی تجدید طریق و اون سکز ساعت دو بره و اون ایکی ساعت فاجت و اون سکز ساعت ریقانام  
محللرده برر کیجه آرامدن صکره اسلیکه نام محله عازم ایکن ریقایه درت ساعت مسافه ده اولان طمشوار قلعه سی  
واروشنده بملک ایله تماشاسنده تدقیق اولمشدر. محال مرقومه بعضاً قصبه و بعضاً قصبه یاننده کیر قریه اولوب  
اوراستیادن دو بره یه قدر درونندن مرور اولنان هر بر قریه نك جارچنده یار مشر ساعتک و بعضاً دخی زیاده  
محله قدر ایکی عربیه به مستوفی و جانبینی حزارع و ترلا طریقک ایکی کناری بر برینه ملاصق موزون درختان  
و بعضاً جمله سی نشو و نماده یکسان اولق ایچون مقطوع الاغصان و بعضاً هنوز مغروس نهالان و موسم  
فریاد عندلیبان اولدیغندن اثنای راهده بعض محله آنلر دخی نغمه زنان اولدینی حالده کذران